

麗

言

壽

造

葬之

顛四四

序

去年冬余自潤州來山左舟楫之所經輪蹄之所歷見夫崇山峻嶺峽岬崢嶸蜿蜒起伏之勢長江大河驚濤駭浪奔騰浩瀚之概與夫風雲詭譎之狀草木蕃變之形未嘗不嘆造物設施之巧而極變化之奇也夫扶輿磅礴鬱積之氣網緼鼓盪之機大則發於山川陵谷小則散於泉石竹木之屬其所爲嶽峙而磊落曲折而紆迴屈伸而偃仰叢雜而扶疏者靡不順其高下自然之性而成奇正相生之理習而安焉而遂莫名其奇與巧也雖然天之生物不測於人獨否乎哉上自君卿大夫下逮販豎耕氓莫不隨其所造而賦之才因其所宜而立之質形形色色錯綜變幻蓋不可以理測而言喻而天更擇其中之賢者智

歷下志遊序

者造就而玉成之困之以風塵老之以閱歷使益其智能而增其學問然後達足以經緯陰陽扶持日月窮足以藻繪山川雕鏤人物非偶然也余友師史氏英姿壯采颯颯動人外高崕岸而內無城府與人交必擇交定則終始不渝以故海內知名之士卓卓自負者類無不想望丰采出肺腑相結納至有數千百里外未識一面馳書道問輒轉介紹以達於君之左右而得一奉清塵以爲幸其爲人亦可知矣弱冠工詩古文辭皆得自天授嘗南遊閩粵荆楚北走齊魯幽燕當世名公卿爭築館傾廡迎因得縱覽名山大川之勝與天下賢人君子遊所至輒有記詩文積盈篋而其氣自此益雄其識自此益擴客歲與余先後來歷下輶軒四歷搜討綦煩鉛槧餘閒問事觴詠俯仰天地流

覽景光探蹟窮幽探風編俗用於今夏成歷下紀遊志若干卷  
其於古今疆域之沿革河流水利之源委山海物產之豐盈方  
言習尚之同異以及山水園林之勝迹街衢闔閭之縱橫靡不  
博考旁稽兼綜條貫以筆之於書非徒侈遊觀弄藻翰也要使  
履茲土而覽是編者得以考究其規模創制利弊得失之所在  
因革損益而爲蒞官出政宜民善俗之方而四方嗜奇好博之  
士亦得資見聞而供披覽以爲臥遊之一助焉君之志亦大矣  
君之情亦遠矣書既成以示余受而讀之與余向者所見若有  
合焉爰述其事而爲之序至外編所載紀一時交遊歌舞之盛  
所以聯風雨之同心而思爲泥塗援手者意亦良厚余不復贅  
云時

歷下志遊序

二

光緒壬午仲夏晦日鴻城杏州居士拜叙

序

蓋聞黃塵觸帽。吳質因以工愁。丹雘息輪。彥先從而記事。是以  
鴻林伏響。語繼齊東。蠶尾餘閒。書徵池北。荆楚歲時之記。卽事  
貽說。都亭師友之編。連情發藻。露葉在樹。常懷前條之陰。霜鴻  
集林。無已同渚之念。又况春風香徑。夜月瓊樓。抒東門編藝之  
章。續南部烟花之錄。窈窕未歇。纏綿景光。休辰邇來。寄託鷓鴣。  
孤懷善感。紅粉惜其飄零。豪情不羣。青衫憐其落拓。斯固義不  
詭。正常昭雅音。思能達憂。足當雜佩者矣。頂石山人。以不聽之  
才。抱遠遊之志。奇氣涉想。靈襟振奇。清琴一彈。獨鴻爲之。翔逸  
襪被四出。斑駁恣其縱橫。北走幽燕。南越嶺嶠。慷慨身世。低昂  
古今。風雲無方。奔蹏之駕。暫阻雨雪。未已。翔空之翮。忽來。猥並

歷下志遊 序

游蹤。乃眷斯契。士龍入洛。郭奕以之心傾。彥昇卽座。王融於焉  
自失。當夫展詩揚音。申商發羽。跌宕文采。察翔藻思。亦既抗謝  
客之聲流。曼卿之韻。猶復寓志搜探。恢奇見聞。康駢賓退之餘。  
劇談著錄。潘岳登樓之暇。問俗成篇。幕府多閒。歷亭選勝。蹤呂  
氏八覽。編諸金石。而無訛。作子雲方言。懸之市門。而垂。喻黃河  
賭唱事。迺亞乎題襟。金樽遺歌。篇無異於書。勃間情。偶賦。軼事  
斯傳。彙爲兩編。釐成八卷。論其標格。似小損於清修。綜厥依歸。  
要無愆乎大雅。僕園畝曠。關河浪湧。鵬翼不飛。猪肝久累。名  
區勝跡。偶寄孤吟。豪竹哀絲。生憐同調。蚤都戀。炬矧。眺覽之常。  
借。燕欲辭。帆流連而誌。語他日。者停雲。遠隔。舊雨不來。結想  
風流。永懷長夕。新書可寄。如親。揮塵之談。昔夢難尋。當。同。心。

之游是爲序

光緒壬午五月下浣古昆蘭玉遐子拜撰

歷下志遊序

二

序

余少時讀青蓮上韓荊州書曰日試萬言倚馬可待未嘗不嘆古人之才之敏捷有天授焉而非人力所可及者後讀蘇文韓文其勢若長江大河一日而馳千百萬里細按之有起有伏有斷有連有統攝有含蓄有跌宕有斷制陰開陽闡光怪陸離其令人不可思議者實運規矩於一心之中無一字一句而有分寸之失其謹嚴也若此而奔放也又若彼今讀孫子東遊志一編十百萬言不下一二月成文義以從俗紀實不事雕琢而氣勢之雄壯奔放儼如長江大河吾將以蘇韓擬之若謂論人宜核實不可虛譽吾則以青蓮目之時在

光緒壬午仲夏同客平陵浮山老者識

歷下志遊

序

一

序

文字得江山之助。氣魄增雄。形勝登記載之編。流傳斯廣。是以  
稗官野史。半皆閱歷之辭。賓館閒居。爰有見聞之筆。編名揮麈。  
采郡邑之遺聞。集號駢鸞。紀程途之所歷。攷東行之雜錄。兼及  
方輿。披南部之新書。可知故實。紀遊之作。由來尚已。山左爲文  
明之邦。夙稱望國。濟南據形勢之勝。久號名城。周秦之陳跡。猶  
存。湖山之遺址。如故。商賈雲集。則擊轂摩肩。裙屐雅遊。則花天  
酒地。儻非有風俗之志。何以壯富庶之鄉。此師史氏歷下志遊  
之所由作也。師史氏系出江東。家居院北。幼而岐嶷。知公子天  
性之豪。長歷艱辛。有阮氏途窮之歎。遂以終軍之弱冠。而續相  
如之賣文。四海爲家。一身作客。西湘楚而東吳越。裝同烟水之

歷下志遊 序

輞南關粵而北。幽燕路並舟車。以進視萬里若咫尺。柳四序於  
風。塵覆月。嘯雲。奇氣欲吞六合。飄蓬斷梗。浪遊乃及三齊。拜下  
風者。諸侯迎上客者。關吏舍館既定。卽與楮墨爲隣。輕裝山遊。  
必訪山河之勝。賭詠畫旗亭之聲。句唱青樓。分箋吟官閣之詩。  
書成黃絹。清新俊逸。殆兼有之。備備風流。洵無愧已。溯等身之  
大著。以紀遊爲最工。當其下筆千言。成章頃刻。以蘇海韓潮之  
氣。寫楚豔漢侈之詞。體仿孟堅。頗詳地志。文兼揚子。亦列方言。  
固鉅細之無遺。斯風景之如繪。至若苔岑契合。詩酒唱酬。美賓  
主於東南。視友朋若性命。相經伯樂。騏驎爲之空羣。聲定鍾期。  
宮商於焉協律。編爲列傳。信足增光。他如柴桑閒情。東澤綺語。  
仿板橋之雜記。錄侍兒之小名。繪粉塗脂。別署烟花之外集。迷

金醉紙足稱風月之主人。提唱爲多。聲價斯重。擬山澤湖泉之秀。匯作奇文。合英雄兒女之編。真成韻事。付諸梨棗。定看名重雞林。祕以巾箱。勿使文教蠹蝕。僕梓桑望宇。笙磬同音。珥筆梁園。每隅坐枚乘之席。鸞文齊郡。又同居元禮之門。重賡伐木之章。時切濫竽之愧。讓君著述。願將自偃旌旗。索我弁言。悔未早焚筆硯。重承雅囑。聊寫駢辭。忍愧于顏。貽誚佛頭之著穢。聞呼必諾。或附驥尾以傳名乎。

光緒壬午中夏下泮夢梅花生拜序時同客平陵

自序

余性喜遊天復假之以奔走之命閒暇之時故自成童遊罕家食弱冠歸家益中落勢不能不餬口於四方遠行之冠製於己卯春日計數載之由足迹及數萬餘里每遊一地居或一二月或七月最久者不逾期年始卒無終三年之淹也性之浮動蓋可知已所至輒攷尋名勝與英奇碩彥之產是邦及客是邦者流連往復搜討遺聞客去酒醒時有記載客歲仲冬來歷下歷下居山左之中形勝爲他郡冠驥人墨客薈萃尤多游覽之餘復萌故態志遊之作倍急於前惟是行止因人恒難自主輪蹄四出留會城者未及九旬足趾所經耳目所及往往記其大略積日既久卷帙斯繁別類分門約成兩編共爲八卷外編率

歷下志遊序

係遊戲筆墨然時勝會亦自難忘統頽之曰志遊紀其實也鄙陋不文何敢矜言著述留俟他日冀免遺忘耳書既成余亦行且還都門得否重來尙未有定去此愈遠追憶爲勞手是編而展玩之則歷城湖山之秀與當日風晨月夕之共談笑而與歡娛者蓋歷歷其如在目前也計劃始於臨清道中脫稿於濟南旅次爲時已三閱月用併及之

光緒八年太歲在壬午中夏下浣遊藝中宸客師史氏識於山左磊磊落落之居

歷下志遊

遊藝中原客師史氏撰

凡例

一是編爲類有八爲綱則只有二正編以地爲綱曰疆域曰名勝曰城闔三總之以習尙外編以人爲綱曰交遊曰叢芳曰歌伎而終之以香屑綴附條分庶使省覽

一志遊之書必求徵實茲編所載不敢鑿空志地諸編多取資於郡邑志乘與平日之所見聞其有今古異宜者必爲詳辨志人諸編必求平允若謂標榜余何敢然

一正編志地省治所在聞見較多形勢之勝自昔著名陵谷變遷尙無大異故先之以疆域邱壑所在可供雅遊先哲云遙

歷下志遊

凡例

尙堪景往故次之以名勝城廂內外街衢甚繁足迹所經必先識徑故次之以城闔風俗不同語言各別瑣碎之事亦足徵今故總之以習尙

一外編志人裙屐風流洵極一時之盛名流薈萃賜詠爲歡萍梗因緣苔岑契合故先之以交遊風晨月夕載酒尋歡未免有情聊爲寫照故次之以叢芳山欄簫眉獨分門戶徵歌度曲足怡心神故次之以歌伎花間小聚勝會頻經用誌閑情積成雜事故終之以香屑

一疆域首郡治次列所屬州縣各處皆先以沿革而後及形勝惟山水湖泉則專舉郡城附近之最著名者足迹所及稱說方真其在他邑者雖屬有名概置不列

一名勝書不勝書儘有名列志書而今已渺不可識者茲編所載專就現所有者言之其最爲著名而已經死蕪者僅仍其名前賢第宅附記於後以志景仰

一城闈向無圖記搜尋頗費經營乃以門爲綱以街爲目分條貫串始得詳明附列公局會館市肆酒樓等名聊知大概一習尚古今攸異專言典雅只足美觀而於風土人情勢必有所不合茲編所載於三禮之大論之頗詳其於飲食衣服之類語言稱謂之歧悉斷自今不爲逾附質之此郡人士或不以爲不然

一交遊以爲時不久性又不慣應酬故半載以來寥寥僅得數子各繫以傳以志生平蠡測管窺原非定論他時展視如與

## 歷下志遊

### 凡例

### 二

晤言耳編中隨手檢錄不計後先閱者勿謂有所鷓黃以重余方人之過

一叢芳因地量材原非上品描脂繪粉間有溢詞然真面廬山亦未全行掩却至謂品題失當則亦眼界各有不同固不欲舍己從人亦不欲強人就我編中專取時髦其已過盛年者列數人於後羣鳴粥粥或亦知所下場耶措大生涯妄欲主持風月一爲念及忍俊不禁

一歌伎率皆貧弱女耶或以藝稱或以色著其兩兼者乃負盛名茲編不應偏才誠不欲使箇中人有向隅之歎也附以鼓詞亦此中之別樹一幟者

一花枝美不勝收廣與搜羅徒費篇幅茲編所列專取其中之

表表者遺珠之憾知所不免

一香屑專記花間雜事間以時節豔遊非敢導淫欲使覽者知此中况味不過如斯愁壑難填早圖醒悟且以知諸姬苦况或思有所援手也

一是編倉卒脫稿掛漏必多俚鄙不文見譏大雅海內同契倘賜斧斯並爲補遺是爲大幸

歷下志遊目錄

卷之一

疆域志

卷之二

名勝志

卷之三

城闔志

卷之四

習尚志

外編目錄

卷之一

歷下志遊目錄

交遊志

卷之二

叢芳志

卷之三

歌伎志

卷之四

香屑志

歷下志遊正編卷一

疆域志

濟南形勝昔號名區南包岱陰北臨渤海舟車絡繹山水清幽滄海桑田原多沿革山林蔽澤不易規模足址所經每好攷證方冊具在用與纂修志疆域

濟南唐虞夏商爲青兗二州之域春秋齊魯譚祝鄒諸國地戰國時併入於齊秦罷封建爲齊郡東郡地漢爲齊國地後漢爲濟南國此濟南之名所由始也三國屬魏爲濟南郡晉因之南北朝爲齊郡始治歷城隋因之唐爲齊州五代宋俱因之金爲濟南府元爲濟南路明改濟南路爲濟南府領州四縣二十六國初因之雍正二年分泰安武定濱三州爲直隸州以長清新

歷下志遊

正編卷一

秦萊蕪屬泰安以樂陵陽信海豐屬武定以利津霑化蒲臺屬濱州八年又分禹城平原陵邑陵四縣屬高唐直隸州十二年升泰安武定爲府以濱州前所屬隸武定又割濟南之青城商河二縣以益之以肥城易泰安之長清仍隸於府又撤高唐臨東昌府屬而以禹城平原臨邑陵四縣還屬濟南今領州一縣十五南有泰山北有渤海東接臨淄之饒西阻濟河之限衆泉競出民物康阜海山左諸郡之冠

歷城附郭以舜耕歷山得名一名千佛山迺志云在歷山之陰春秋戰國謂之歷下又謂之平陵函歷諸山導其前鵠華羣峯抱其後明湖蕩漾灤水縈環眞古齊名區東藩首邑云章邱在府東百一十里舊志云爾雅云上正章邱注云頂平也



通志云縣南有章邱山縣志云因縣城中上正章邱爲名春秋  
崔頽二地皆在此東控長白北枕女郎山盤虎龍水統濟嶺  
鄒平在府東北百八十里古鄒侯國姚姓舜後也水經注夏商  
之際舜後封於鄒則鄒之名已古矣至漢始置鄒平縣後皆因  
之跨清河而控長白襟黃山而帶沙河縣志謂形如脚螺信然  
淄川在府東南二百三十里舊名般陽以縣在般水之北淄原  
實在原山下流卽今益都之淄河禹貢所謂濰淄其道也至隋  
始改淄川後皆因之岱宗西南來連岡斷阜捲碧飛青數百里  
皆山也孝婦般萌諸水旁納山泉循山北注實爲秀區

長山在府東二百十里以長白山得名三代時爲於陵地卽陳  
仲子所居南北朝爲武強縣隋改今名後皆因之山圍長白河

歷下志遊

正編卷一

二

繞雙清實東萊之通道爲青齊之要衝

新城在府東北二百二十里本長山之驛臺鎮元太宗謂人民  
完聚因創置城曰新城後因之春秋時齊桓公繫馬臺在此鐵  
山四角峙其東西烏水清河經其左右亦形勢之區也

齊河在府西五十里本祝國地周武王封黃帝之後於祝春秋  
諸侯盟于祝柯卽此左氏謂之督揚故城臨大清河後漢耿弇  
討張步濟此因名耿濟鎮宋置齊河鎮金改爲縣仍宋之名後  
皆因之清河左繞沃壤連封舟車往來郡外要地

齊東在府東百八十里以在齊郡之東得名秦漢梁鄒縣地金  
阜昌間改趙巖口爲齊東鎮元始升鎮爲縣明沿舊制別號東  
阜國朝因之控海名區瀕河重鎮

濟陽在府東北九十里濼水之陽大清河之北本濼濱也自大清河歸濼濱入海通得濟之名故曰濟陽春秋時甯戚采地金分章邱標牟鎮地置濟陽縣後皆因之濼水達於沽河古屯確於林莽烟村斜繞瀟野平鋪

禹城在府西北百里縣故治西南有禹息古城故名古祝國地漢爲祝阿縣唐天寶間始改今名後皆因之地有貝邱川有釜阿背控津門西楫泰岱臨河爲城城周九里郡屬一大輔邑也臨邑在府西北百五十里以臨汜水得名齊犁邱地又名濼陰春秋晉荀琦伐齊取轅及犁卽此漢去水從邑置臨邑縣後皆因之東連濱棧西控德博南臨濼水北繞鉤盤九河故道多出其間形勢森然詩勝槩焉

歷下志遊

正編卷一

三

長清在府西南七十里以邇大清河得名春秋齊師伐我及清卽此盧邑亦在此漢魏以來皆爲盧縣隋置長清縣因清水以爲名後皆因之大清河繞此東極於海青崖諸峯直接泰岱阻山帶河扼塞四固

陵縣在府西北百八十里古重邱地春秋盟于重邱卽此漢置安德縣隋爲德州明移陵縣治此縣以隋格陵縣得名厥次之墟齊川之阻有重城以爲障洵沃野之名區

德州在府西北二百八十里古有鬲氏國國在河濼之間漢置安德縣隋爲將陵縣開皇間置德州金爲景州元爲陵州明改陵州爲陵縣尋升德州 國朝因之古九河之地黃河所經史記封禪書昔秦文公出獵獲黑龍此其水德之瑞於是秦更名

河曰德水方山東抱衛水西環南北通衛水陸要道

德平在府北二百三十古屬國陸終國漢爲平昌縣後唐改爲德平後晉因之齊廢捍其北鄙南津據乎上游馬頰經前鈎盛帶後西隄德水東接棊州兩漢六朝均稱勝地

平原在府西北百八十里古爽鳩之墟戰國平原君趙勝封邑漢置平原縣後皆山之兼古鄒繹幕之地唐平原郡在今陵縣顏真卿守平原處雖乏名山而襟帶河流潄蕩衍秀昔置郡國於此以控扼齊趙之交良有以也

濟南山脈有二其自西而東者以泰山爲主自東而西者以長白爲主所屬近山者七縣長清歷城連泰山而分其支麓鄒平長山則近長白山章邱分連二山淄川專分長白新城承泰山

歷下志遊 正編卷一

四

支麓之委而分其餘按泰山本屬濟南自升泰安爲府泰山始不在疆域之中今府屬與泰安分界之山起長清中歷城訖章邱其起訖皆以長城嶺是主峯雖在泰安而支脈已及濟郡矣歷山在歷城縣南五里一名舜耕山古有舜祠隋開皇間因石作形鏘成似相故又名千佛山建寺於上春秋佳日裙屐往遊山徑甚平頗可安步間有乘筇輿者價亦不昂相傳歷山頂爲城東南最高之地山在人家竈觚下未及往視今郡城歷山門內迤東有街名歷山頂則非其地矣

大例山在城東十里一名仰慧山上有文筆峯中爲開元寺在昔名賢多讀書其中西爲羅家寺山之陽爲圍馬場其巔有塔明萬歷間建以助文明之氣